

四庫全書

集部

欽定四庫全書

宋元詩會卷七十九

兵部主事陳焯編

陳旅

字衆仲興化莆田人先世以儒學稱旅幼孤資稟穎異於書無所不讀稍長至溫陵從傅古直游聲名日著用薦為閩海儒學官適御史馬祖常使泉南一見奇之勸其遊京師既至虞集見其文慨然歎曰此所謂我老將休付子斯文者矣與祖常交口延譽於諸公間中書平章趙世延又力薦之除國子助教三年考滿諸生不忍其去請於朝再任焉出為江浙儒學副提舉擢應奉翰林文字遷國

子監丞卒年五十有

六所著詩文十四卷

春山圖

春山雲木暝初日映遙岑
林霏翳高閣望之勞我心
幽逕緣崖迥飛淙響磴深
芳月忽已晏誰哉與登臨

秋山圖

之子託冲隱秋山樓觀深
矧茲及霜晨遐矚沈氛陰
翠巘含白雲丹楓映青林
靈溪鳴石溜野屋負層岑
趨喧事多違即曠恒愜心
何哉芳月晏而我阻幽尋

湖上分韻得春字

君子佩明信相期湖水濱時欣宿雨霽畫舸送遊人輕
鷗集蘭渚佳樹變鶯晨山遠烟容淡日出水光新美人
含麗思艷曲歌陽春睽攜會彌歡酣適趣益真茲遊敦
德誼况乃及茲辰

安福李氏臨溪亭

結屋負南郭清溪流屋前端居塵事少水木自幽妍滌
研弄寒碧鳴瑟寫潺湲沙鳥時近人汀雲相往還烹鮮

毛溪毛留客坐前軒逝川道體著觀物悟微言

題楊顯民來詩卷後

夢遊洞庭野斜月映疎星軒后來張樂伶倫吹鳳笙夢
回憶其音幽邈有餘清截竹學向人世人皆不聽南州
有高士洗耳卧巖扃涼風鳴松林石磴響琤琤何日即
與語曠然千古情

賦雲錦溪

綠水春生渚丹花集陽林愛此雲錦好蘭舟轉溪深賀

監謝軒冕載酒過山陰遙聞櫂歌發縹緲不可尋

題朱元暉漂陽溪山圖

宿雨散層巘林麓翳烟霏遙山斷復連川上初晰微我
昔困行役漂蕩秋未歸幽子喬松流邂逅啟郊扉撫景
正若此別離嗟願違覽卷遂終日溪雲欲生衣

次韻寄太乙宮上官師

二首

端居感流序階樹日撼撼涼風起高城上有南飛翮揚
雄不邀名拓落猶遠客美矣陶徵君斂裳去彭澤

我居城東南西北有殊庭病久曠冲賞懷哉松桂青曼
倩諒奇士夙受火珠經雲河澹秋夕泰時明三星

桃花鵝鵝圖

婀娜絳花明連娟碧筠靜金塘春水多文禽汎晴影大
堤寫遊棕日照華服靚萬殊各有適況及芳歲永

陶淵明撫松圖

原野涼風至草樹日蕭條杖筇還故丘青松在東皋孤
陰近衡宇薄日映層標念其有貞操撫之以消搖

明妃出塞圖

昭君北嫁呼韓國巫山更有昭君村黃金鏤鞍玉驄馬
分明載得巫山雲涼風吹動釵頭雁一曲琵琶寫幽怨
沙草遙連雞塞庭野花不種鴛鴦殿內家日日選娉婷
淚痕滿袖空多情漢廷自此恩信重美人身比鴻毛輕
蘇伯修往上京王君實以高麗笠贈之且有詩伯
修屬和

往年飲馬灤河秋灤水斜抱石城流青城丈人來水上

揭謝蘇王皆與遊顧余濫倚橋門席斜陽半落鼇峰石
夜涼共飲明月樽醉眠更聽高樓笛灤河九曲流濺濺
自我不見今三年蘇郎又扈屬車去佇望弗及心茫然
龍門峽中雲氣濕山雨定灑高麗笠別意遙憐柳色深
歸心莫為鶻聲急不才未許收詞垣賦成何日奏甘泉
人言凡骨難變化為我致意青城仙

謝氏祖孫創灋陽橋

灋陽極目雲氣昏衝風揚波鼉窟翻湘妃抱琴望虞舜

日暮江竹多啼痕水蘭為舟不可度誰幻層淵作平路
天潢夜靜牛渚長海市朝晴蜃樓吐祖孫移山山可移
昔人不信今見之千年猶有召伯埭白面聚斂嗟何為

海谷

歸虛谷在渤海東八紘之水注其中不盈不縮浩無際
吞吐日月含空濛靈鼇於此負山出上有縹緲金銀宮
人間相去幾萬里弱水滿眼多迴風琴高來時踏赤鯉
少君歸去乘白鴻秦王到老不得渡嗟我欲往將焉從

子房有孫海谷子告我有路非難通只隨雲氣相上下
與子共謁扶桑公

宮人倦繡圖

龍碧蛟綃剪秋水輕風吹香團扇底琵琶彈歇宮晝長
釵落鬢邊雙燕紫二妹誰是薛靈芸繡得金塘兩鴛似
宮奴夕殿喚更衣露濕銀牀響桐子

友人記余少作因錄之

溪村積水生寒烟匡牀睡起清明天隔溪暮哭人飯鬼

滕間燒錢野風起酒旗山前雨疎疎來禽花低飛鷓鴣
荒墳累累出新草草長如人人又老東門大道青陽間
可憐車馬無時閒

次韻上官來復見寄

琳館薄炎熱松壇深歲年高人坐堂上疎雨落堦前潘
岳頭空白楊雄學未玄定應拂塵服從子弄雲泉

楊李子水北山房

豫章楊李子語我草堂幽野徑穿雲入山泉繞舍流竹

光書帙曉溪影釣絲秋水北真佳隱誰從節度遊

方壺道士作荒山白雲圖寄豫章楊顯民

之子讀書處亂山生白雲林花晴冉冉巖瀑暝紛紛畫
此何為者持之以贈君謂宜作春雨舒卷只成文

清漳黃氏北墅

聞說黃家墅開門入翠嵐細岑依舍北流水出城南雨
暖蘭抽筍霜晴樹落柑千年讀書地更莫乞羊曇

題羅稚川畫卷

雨氣通林壑江光動野航道人巖下去茅屋樹邊涼斷
岸入秋水遠山留夕陽登臨休作賦遊子未還鄉

謝徵君松巢

昔聞徵君在天目松間結巢成久留南榮北郭井里近
西枝東柯林谷幽蕙帳眠深翠露落石泉釀就緗花浮
擬借丹梯向高處枳白桐乳非吾求

送鄭希道杭州路知事

幾年讀書白鹿洞諸老遲子黃金臺豈為錢塘足清賞

遂令幙府得英才郡中日晏文牘少湖上春晴畫舫開
我向都門折楊柳予亦寄我孤山梅

送張真人代祀武當龍虎兩山

桂館祠官持羽節名山兩地躡丹梯共誇曼倩來金馬
大勝王褒祀碧雞杵礪痕銷雨石杼巖秋影動星溪
蕙肴椒醕登瑤席定有神光起時畦

次韻本元上人相別

君向雷峰塔邊住詩成總在倚欄時蘇堤殘柳凝烟小

葛塢間雲度水遲
衲子定回花繞座
高人別後草生堦
相知不似渾忘卻
誰問莊周與惠施

送李盤中真人代祀江南三名山

弱水回風不受帆
三山只在大江南
使槎卻帶秋星溼
仙掌遙分夕露甘
瑄玉禮神通景氣
寶香隨地結晴嵐
泰壇建論昭靈貺
老我猶能效史談

題城市山林圖

城市山林路不分
畫橋騎馬是徵君
樹頭粉堞連青嶂

陌上紅塵亂白雲
水巷柳深鶯喚友
陽坡草暖鹿為羣
滑稽誰似東方朔
更向金門避世氛

懷慶王節婦

良人飄渺泊烟鴻
窻竹寒沾雨淚紅
檜楫不游淇水上
柏舟仍見衛風中
龜文屈曲秋機斷
鸞影低徊曉鏡空
贏得公名寫桓表
千年光燄吐晴虹

送朱運峰著書得官南歸

城東有客過吾廬
揮麈高談逸氣舒
金馬豈無方朔伎

石渠今取夏侯書沙隄老屋秋楓合海浦歸帆暮雨疎
我亦草玄官拓落江南無地可耕鋤

元宵懷錢塘

武帝親祠太乙神流光洶湧動星辰行宮典禮猶存漢
軹道山河已易秦香徑至今啼木客露盤無復泣金人
紅燈幾點東風裏猶是元宵一度春

院中聞駕先還再和伯修

甘泉宴罷雁聲寒桂樹吹香出寶闌翠輦遙臨秋海白

霓旌高拂曙星殘，
毳城家拜銀鷹賜。
棘院人爭繡虎看，
堪笑子雲能作賦。
獨騎瘦馬後奚官。

送王致道代祠北岳北海濟瀆南鎮

皇帝齋明守鎮圭，
祠官奉節出金閨。
北尋海瀆瞻恒岳，
南涉江淮上會稽。
山下靈風吹桂櫂，
雲邊仙樹拂丹梯。
王褒室有甘泉頌，
投老還鄉祀碧雞。

送毛真人南還

真人不似壺丘子，
老去都忘杜德機。
太乙象文令虎守，

尚方鳬舄背人飛
巖扉暖翠侵
綳帙江渚晴霞上羽衣
遊子故園春似海
客牕長日聽催歸

壽虞先生道園

衡山道士駐飛車
千載儒宗出相家
月下華星生五色
人間珠樹吐三花
芝田養鶴春凝乳
茝石聽鶯曉颺霞

朝退日長賓客醉
翠房文火伏丹砂

道園生時其外祖夢衡山道士

送趙子期使交趾

曉日承恩紫殿深
都門祖道馬駸駸
上書不奏唐蒙策

歸橐寧將陸賈金露入珠盤
鮫室白苔生銅柱象崖陰
為君臨水歌黃鸝天北天南
萬里心

天谷

東郭先生履欲穿尋幽俄得谷
中天漁人誰去緣溪岸
山鬼能來送石泉池暖碧桃深
映雨林春琪樹總含烟
後來聞有何高士傳得終南大洞篇

題雲林晴曉圖

故人別後江波綠神女歸來峽雨乾
海上日花春冉冉

天邊雲樹曉團團滿汀芳草留孤艇度石幽泉咽下灘
最愛東頭小亭子聽鶯何日一憑闌

為董宇定賦杏林詩

侯官古縣多山水中有當年董奉家
邑子每懷江上樹仙人還種日邊花
珠林夜氣凝丹露貝闕晨光散綵霞
我憶舊遊成遠別上東門外立昏鴉

福州冲虛觀

力士持兵守絳宮吹笙人去斗壇空
白榆城闕秋雲上

紅樹樓臺夕照中
鴻寶昔疑丹井謬
龜泉今悟玉池通
他年不跨芝田鶴
曾向清虛學御風

次韻陳景思見寄

用世已無伎
高人方據梧
詞林忝供奉
客舍候徵呼
拓落需微祿
騫騰失壯圖
為文下枚孺
力穡後孫愉
春草生湖曲
晴雲飛屋隅
論交尊有螳
意別復非鳬
擬汎鷗夷舸
重遊泰伯都
山泉斟雲乳
石萍瀹瓊酥
作繒溪庖近
聽猿野磴紆
松風吹綠鬢
花雨落紅氈
佳什勤相贈

幽期愧獨踰煩君語宗長為我謝寅夫

題畫蘭竹

美人隔澧浦日暮倚幽篁繁霜忽已頒為我紉秋芳

題水仙花圖

莫信陳王賦洛神凌波那得更生塵水香露影空青處
留得當年解佩人

題耿氏所藏豔圖

五月風生水殿涼綠楊深處奏鶯簧佳人偏愛臨池坐

欲與荷花鬪晚妝

為彭道士賦鶴峰

跨鶴臺高倚翠微
昔人城郭是耶非
藥珠宮觀秋如水
有客吹笙月下歸

題張氏風竹圖

湘江風卷白頭波
北渚雲深帝子過
欲采瓊芳渡江去
翠衫輕薄曉寒多

貢奎

字仲章寧國宣城人以文學名家延祐至治間官京師為集賢直學士卒諡文靖 焯按元史載奎於其子師泰傳中未詳履歷及別考家乘云奎幼名三郎和易端重始授池州齊山書院山長尋徵赴吏部至德六年擢太常奉禮郎遷國史院編修丁憂服除除江西儒學提舉復入翰林為待制終直學士生平著作甚多俱散佚無存所傳世者僅雲林小稿而已

秋日陪大學士趙公憩龍山玄真宮

巖巖居庸關左挾飛仙居蒼茫四山合石徑穿盤紆人家稍相接林木何森敷觚稜生曉烟玄風凌紫虛念彼羽流集豈與世俗居溪流轉雲磯餘潤分園蔬鐘磬答

空谷齋供薦芳腴穹碑紀宗傳道一教乃殊素餐貴崇
本卒歲事耕鋤漁父在何許室有桃林株坐慚秉文幹
尸祿常曠迂日暮陟層巔丹霞成長裾遙睇室中雲超
然能卷舒

虎林玄妙觀

琳宮古崔嵬獨據山勝絕天光垂帝座照耀金碧色脩
廊接層崖俯日視深澤陰陰木葉暗石削蒼壁冽流泉
出嵌空六月灑飛雪平生功名謀洗我肝肺熱同遊得

幽人再拜摩斷碣興亡見唐漢高爽了吳越更擬窮幽
探馳景忽西滅

題董簡卿所藏瀟湘圖

瀟湘在何處展卷心悠然是中浮雲飛上與蒼梧連憶
昔弄扁舟載雪清江天湘君招不來明月在我前微鐘
破征夢落雁栖寒烟回首行萬里攬衣羨孤鶩可憐楚
人詞憔悴窮歲年圖畫豈不好此意誰復傳已矣三歎
嗟臨風叩商絃

雪晴

今晨持我書燕坐雪照屋閉門謝塵鞅展卷自朗讀衆
說初若攻冥思意纔復旭日上團團清泉喚春綠涓涓
晴欄溜洗眼濺飛瀑宣不事遊觀驅馬泥及腹永懷同
袍士歲晚在空谷好風忽東來起翫庭下竹

邳州

古城結危構交達裒招延朱碧遞隱見岡迴勢蜿蜒填
車縱橫遊重屋光華鮮扣門多乞食民饑遠流遷桑柘

重謁綠鬱鬱浮蒼烟念此萬里道我舟亦已旋雲樹列
環岫晴鳬散平川烜赫驪珠光隨風墮靈篇神清契高
冥性斂涵靜淵出處古異途世故寧紕纏簡書誠可樂
軒冕非自捐推蓬晚逾迅凝霞助孤騫

秋懷

瑤漢夜澄寂烈烈羣象嚴浮雲翕交互圓光尚微纖階
蟲競鳴響濕螢度飛檐持志惕自警屏營以深潛驚飈
度幽幌凝香啟方奩栩栩莊生蝶秉志能養恬雞鳴何

孳孳憂心愧如惓

答陳華仲 二首

海上三神山上有學仙侶
泠泠紫簫聲吹作飛鳳語迴
颺蕩溟海散落成烟雨
豈無知音者一振九苞羽持之
獻天庭上以奉明主

貧賤交有道富貴多異途
所以古君子擇交嚴所趨
霜劍間寶室烈士發長吁
隔世或相慕同居秦越殊
寥寥千載間羨彼管鮑徒

題淵明圖

若士超世流高風凌飛仙倦懷經濟術嗜酒豈自然去
之千歲間賢才孰相先畏途輟皇皇歸歟袖翩翩日暮
孤雲飛黃花澹秋妍坐憐王弘輩矯首南山巔

即事

藹藹羣樹林孤雲暮來歸紛紛飛鳥倦斂翮相因依臨
軒方獨坐涼颼吹我衣物理固有常悠然悟其機山中
何者樂躬耕自無饑百年事未晚寧勞歌昨非歸歟友

田父一樽聊可揮

送別劉道夫

春晚益可愛綠陰蔽前郊
念子暫時別我心已云勞
浮雲始舒霽倏見疎雨飄
暄爽驟變更豈異世俗交
微飈起林杪清池樹光搖
沈憂渺予心哀髮矧漸凋
悵馬立斯須幽禽語嘒嘒

雨中

驟熱變風雨氣候一日殊
綠樹擁如蓋殘花落無餘
閒

居日偏永手把種藝書幽幽魚鳥適寂寂車馬疎田父
二三輩濁酒時來俱愁陰每思霽微涼意稍舒攜筇獨
延佇層雲起遙墟

送史高士謁吳閶閣

春水武昌船帆飛敬亭雨孤城壓喧囂聽此檣燕語揮
手謝時人開胸散煩暑煌煌闕下書曳曳雲間侶真人
紫霞佩執簡授璇宇攬衣欲從之神交諒頃許霽雨沐
霄容風微鷁初舉遊心愜高明脫屣邁行旅懷哉會何

時酌彼盈樽醕

送鄧提舉之官浙江

白雲一觴酒離思滄溟間子行勿復居念我何當還杳杳飛鴻書瑟瑟清鏡顏潛機不私貸歲月忽已闌贈之雲錦章譬彼蒼玉環何以解塵纓幽泉弄潺潺

拜醮北觀

齋罷敞春服跣履步脩廊籠禽動新響青雨餘竹風涼道人房更深爐烟引微香於焉謝塵鞅間來日偏長

登虎丘山

吉士雅巾履具舟約芳遊朝晴出西郭午涼登虎丘松
逕度遙嶺歷此層級脩當時吳王劒斨光裂蛭幽平甸
眺萬頃間瞻烟樹稠頗聞山僧賢飛錫下林陬獨遺方
丈室於焉集清流一簞可平生豈惜半日留煮茗試泉
冽焚香延宿篝疎雨催晚歸隨波散浮漚

京城客館

公宇日無事閱書稍怡情浩漫罔窮極靜定悟始明籠

禽動幽響庭草遂微生俯念節物變宴處常懼盈寧復
辭勞苦王事驅我行雨餘夕陽照空雷殷殘聲暄爽倏
未定雲勢方縱橫訪遇當獲趣及茲煩抱嬰何時故園
友濁酒與同傾

寄示師文姪

川明山秀草花馥氣連鬱儀迴地軸晴嵐宿靄屯氤氲
石根飛泉迸寒玉此中縹緲仙人居樓觀金碧繞翠竹
我来曾住纔七日迴首人間白雲速飄搖金衣鶴雙飛

白玉童吹紫鸞曲天聲忽遠奈別何青山送人秋思多
作詩寄汝仍自歌梅花零落雪吹盡願拾瑤草山之阿

謝李息齋惠墨竹

湖州墨竹蘇州詩李侯二美能兼之長安塵中忽到眼
坐我六月江南時幽人江南結林屋紫碧森森萬竿玉
清風激昂此君語六月寒生不知暑只今見畫思故鄉
博山日永凝清香人生萬事直適意相對悠然希坐忘

寒食掃松即事

東風微微吹雨晴春山草暖雉飛鳴時哉物性各有適
人生悲樂難為情客行十步九回首寒食道旁多哭聲
往年攜手原上頭今年酌酒原上丘相逢須識夢中夢
有聲莫帶愁中愁

送劉道夫

西崦松篁路雪消沙水清天寒行役倦酒醒別愁生落
日橫車影長雲送雁聲梅花應未發留待照春晴

秋日陪集賢學士趙敬夫憩龍山玄真宮

山轉疑無地人家近隔村野田秋穫盛岡路晚行喧川
淨雲生石溪平水到門偶尋高士隱相見遂忘言

贈孔令尹

百里光山遠三年縣令賢人皆思舊德我欲賦新田綠
霧桑浮野黃雲稻際天風流昔潘岳空作種花傳

試院次韻答吳草廬先生

暫客留應喜微官去恨逢竹高當戶直花重向簾垂對
酒驚人別看詩感歲移山中足幽事猿鶴舊曾期

陽墅道中

馬上千峰列溪行不盡源野船高似屋山縣小如村路
遶田間曲池漫雨後渾靜來應最樂綠樹擁柴門

即事

小雨春寒重吳蠶上箔遲枕欹清夢覺窻掩綠陰垂喜
聽林鴉哺間看埕蟻移相思故人遠誰與話心期

憶昔

暗憶曾遊地遙看不盡天宿雲連野樹積雨聚溪船故

友疎三益微官負十年間居成癖性長日枕書眠

遊大梵寺

三首

逵客閒無計微官欲賦歸偶尋幽寺去頗覺俗情非
涸澤饑鷹戀高空獨雁飛西風如有意向晚襲人衣

清溪盤百曲虹影駕橫槎春事怨行客夕陽啼亂鴉
山明分衆木天濶散悲笳卻羨僧家勝推窗瞰水涯

遨遊窮樂事模寫得新詩古寺看山後微風到竹時
地幽塵不染人語燕歸遲向晚寒猶峭惟應客袖知

居庸關早行

茅屋聞雞起羸驂並轡行
澗深孤磑響山暗數燈明
細憶留題處空慚不棄名
客愁偏切耳斜月候蟲鳴

濟州

舊濟知何處新城久作州
危橋通去驛高堰聚行舟
市雜荆吳客河分兗泗流
人烟多似簇聒耳厭喧啾

郊行

雙溪溪上路重到五年遲
桑柘成陰處鶯花向老時
泊

舟隨岸曲坐石看雲移
政愛沙鷗狎驚飛底見疑

郊行

馬上看山不盡客中行
路路偏長叢祠社散羣鳥啄
層漢秋高數雁翔
疎雨著人絺袖濕微風吹面稻禾香
迴岡偶憇幽塘上顛倒松陰百尺彊

久留翰院思歸

日日思歸未有期
夢魂幾度遶園池
白雲滿地山深處
紅日當簷雪霽時
竹外板輿春步小花間銀燭夜筵遲

好將烏鵲頻占喜便買歸舟泛碧漪

得家書

睡起相思勞寸心捲簾無語立簷陰故人千里碧雲合
斜日半川紅樹深江雁忽傳秋後信隴梅應待雪中尋
天涯奔走成何事輸與寒窻抱膝吟

試院秋日即事

薄遊時覺鬢毛蒼病怯西風夜更长官冷久無金馬夢
院深惟有木犀香歸舟欲解天如水故友難忘客思鄉

試問宋郎愁幾許
雁聲何處起滄浪

邳州

荒城十載路重經
暫艤扁舟坐驛亭
春到梅花何處白
雪晴山色向人青
驚心家遠書難寄
迎面風寒酒易醒
莫憶牽衣兒女態
曉猿霜鶴笑林扃

送謝明遠之官平江

碧波千頃照姑蘇
目送危檣數幅蒲
古寺雲遮丘卧虎
荒臺葉落夜啼烏
黑頭清鏡來勲業
綠幕深衣入畫圖

暇日過遊新得句秋風應寄故鄉鱸

送汪叔志之南安

繞郭清溪帶路長衝寒極目送危檣水涯梅柳傳春信
雪後樓臺照夕陽杜牧吟邊山鳥去謝公行處石苔蒼
碧雲暮合天無際回首相思欲斷腸

貢性之

曾選附貢性之詩于仲章集後未嘗略著其生平
按仲章子為貢師泰至正間官湖江行省參政有
姪貢友初亦因師泰僑寓錢塘師泰極愛之曾贈
以詩有頌椒留子美戲蠟愛僧虔之句今考性之

詩首西湖燕集當即倚錢塘之友
初也友初其字而性之其名乎

西湖燕集分韻得南字

我志在丘壑野性夙所耽
今晨適休暇樂此風日堪而
我二三友濟濟皆儒簪
扶藹眺西郊到處窮幽探
湖光淨澄練山色浮晴嵐
林木葉已脫梅花藥猶緘
言瞻和靖祠芳草埋空缶
載登岳王墓老樹雲相參
眼明三竺國金碧眩精藍
商歌起樵牧清梵來瞿曇
方將復夷曠尋復躡巉巖
去去不知遠落日山脚含
美人具清讌畫

舫如雲龕浮游六橋間水天遙共涵

賦得蛾眉亭送胡長史粹中之楚

雙蛾橫翠黛孤亭枕江流伊人適行邁於焉拽蘭舟山
空夕烟斂月白水光浮永懷謫仙人浩歌動清秋風景
詎不美公程靡遲留明發指武昌千里路悠悠言從夏
口驛遙經鸚鵡洲王國實重鎮屹然居上游皇圖永萬
古輔翊在謀猷茲行亦已壯毋使增離憂

牧牛圖

溪童飲牛渡溪水牛遇水深行復止人知水深牛不行
誰識回頭顧其子桃林之野春雨晴燒痕回綠春草青
大守勸農當二月土膏肥暖牛可耕邯鄲城頭征戰息
甯戚徒勞吟白石一聲笛裏太平歌牛背溪童自朝夕

唐馬圖

開元天廐多良馬四十萬足皆龍駒奚官牽出立仙杖
箇箇五花雲錦如許教芻粟官家給餵飼何曾敢相失
花邊柳下恣長鳴不比駑駘甘伏櫪太平天子無戰爭

四海久矣風塵青青絲絡頭玉為轡看花不出長安城
世間豈無千里足往往徒遭奴隸辱如何獨領鳳池春
慎勿從人厭羈束

宮梅圖

璫樓夜寒銀漏澀滿地霜華月光白翠禽啼斷夢中魂
窈窕虛窻碧紗隔千門深鎖含章宮未許人間識春色
只愁笛裏曲聲哀零落香鈿點妝額

林壑深秀為鄧宗經賦

芙蓉城郭自天成長日開軒看雨晴飛瀑曉翻千嶂雪
驚濤秋湧萬松聲雙雙去鳥風中度一一遊人畫裏行
濟世功成許歸隱肯教林壑負深盟

清燕堂

江山深處畫堂深朋宴曾聞屢盃簪奕世衣冠惟望族
百年桑梓尚喬林珠簾捲雨聽春晝寶鴨含烟散夕陰
我亦有懷同笑語圖書堆裏坐鳴琴

送陸景宣靖州從軍

蠻荒溪洞極邊頭
仗劍從軍憶壯遊
楊柳春風千聚落
旌旗曉日萬貔貅
路經彭蠡洲前過
江自巴陵城下流
早報遠人歸聖化
貂蟬從古出兜鍪

送戴伯貞簡校還廣西

桂江烟水接瀟湘
逐客歸來道路長
卷裏謾多新製作
篋中猶是舊衣裳
逢人且說身如夢
老我相看鬢已霜
此去莫教音問隔
雁飛今喜過衡陽

水竹軒

萬竹瀟瀟水遶門
九街車馬自昏晨
晴天波影搖窻戶
靜夜秋聲入夢魂
曾為故人頻下榻
每因佳客屢開樽
百年清致今猶昔
春雨深深長子孫

城南耕隱

愛爾城南隱者居
春田遶屋總膏腴
兒孫候暖晨驅犢
燈火分涼夜校書
入社有懷占樂歲
趨朝無夢候公車
相逢自歎飄零久
投老歸來愧不如

次萍居留別韻

且復長亭折柳枝離筵已判酒如池因思會面難期處
直使銜杯到醉時檣燕留人雙上下岸花迎客半低垂
計程明日毗陵道吟寄新詩欲倩誰

有懷夏文度文表昆仲

珍簟生涼簇浪紋寶爐香煖散晴薰葛巾白苧消三伏
繭紙烏絲寫八分文字勇追韓吏部詩才清逼鮑參軍
眼中年少多如許獨爾風流莫與羣

題畫山水

山水東南勝遊遨歲月遷登高頻折屐載月屢移船鏡
水荷花裏秦雲嶺樹邊猿偷霜果下鹿借石牀眠野趣
閒誰適詩懷靜自便洞深通窈窕澗曲寫之玄采藥時
逢虎看棋或遇仙僧留題竹字鶴避煮茶烟捷徑惟增
愧移文只浪傳種桃春萬樹別有武陵天

東坡竹

玉堂罷直獨歸逢墨藩將秋入硯池坐到夜深清不寐
鎖窗涼影碧苔差

畫馬

天閑牽出許奚官飲罷春流未解鞍記得曾陪仙仗立
五雲深處隔花看

附郭矮梅詠炭詩

此詩極為貢所賞故錄之

樵青顰面學崑崙斫月燒雲樹欲髡萬竈黑烟灰出
劫一星紅燄火還魂汚身若有仙翁幻報國今無義
士吞爭似茅齋風雪夜地爐榾柮暖溫溫

薩都拉

字天錫本京口朱氏子冒回
同姓與黃清老同年進士

題焦山方丈壁

江風入霜林寒葉下疎雨蕭蕭復蕭蕭可聽不可數山
僧亦好奇呼童掃行路到處覺秋聲肩輿入山去

秋日病起池上

顧茲林塘幽消此閒日永飄風辭萍踪落葉散魚影天
池風露涼秋深藕花冷有懷無與言獨立心自省

早發黃河即事

晨牽大河上曙色滿船頭依依樹林出慘慘烟霧收村
墟雜雞犬門巷出羊牛炊烟動茅屋秋稻上壠丘嘗新
未及試官租急徵求兩河水平堤夜有盜賊憂長安里
中兒生長不識愁朝馳五花馬暮脫千金裘鬪雞五坊
市酣歌最高樓繡被夜中酒玉人坐更籌豈知農家子
力穡望有秋短褐長不充糲食長不周醜婦有子女鳴
機事耕疇上以充國賦下以祀松楸去年築河防驅夫
如驅囚人家廢耕織嗷嗷齊東州饑餓半欲死驅之長

河流河源天上來趨下性所由古人有善備鄙夫無良
謀我歌兩岸曲庶達公與侯淒風振枯槁短髮涼颼颼

寄朱舜咨王伯循僧即休

三首

大江湧金山穩若青蓮座山下有龍宮見水不敢唾江
山萬古同日月片帆過把酒妙高臺狂歌醉相和

飄飄鶴林僧布襪青鞋雙長江飛鉢度碧海魚龍幢
來作偈別楚雨鳴秋窻振錫獨歸去天花飛滿江

微茫揚子橋細雨濕秋色小艇載吳姬搖搖語相接風

起布帆高一往不可得夜宿廣陵城吹簫照明月

宿烏石驛

雲起烏石峰雨洒紫溪嶺孤館如山深愁人覺宵永燈
花剪復開風竹亂不整清晨度闌闕南斗落衣領好寫
度闌詩點筆題石筍

石上晚酌天章臺

高臺在層霄肩輿上絕壁露下酒樽涼月出海門白坐
拂衣上雲醉卧林下石西風吹鬢毛南斗在肘腋題詩

向天闔奎光射瑤席

宿臺山寺絕頂

江白潮已來山黑月未出樹杪一燈明雲房人獨宿近
水星動搖河漢下垂屋四月夜深寒繁露在脩竹

夜興

半峰走晴雷風力吹邊雨層雲不成陰殘缺如敗堵山
深日易暝孤館孰賓主燈花翳復明落葉聲可數獨立
誰與親厨人夜深語

題茶陽驛飛亭

白雲飛出山怒擘蒼峽裂幽谷響晴雷絕壁洒飛雪萬
折入滄海龍宮水晶闕簸揚弄珠人冰簾挂寒月

贈白雲

白雲抑何間竟日不下山時從脩竹裏相伴一僧還悠
悠覆松頂渺渺歸岫間奔走塵俗客視君多厚顏


望武夷

溪行望武夷峭壁何斬絕赤霞亂不收大化元氣泄下

有萬年松上有太古雪祇恐明月中鐵笛吹石裂

宿武夷

艤舟山水間借問武夷觀月挂水晶簾風吹紫霞幔雞犬過雲間笙樂度天半傳語武夷君酒熟幸相喚



宋元詩會卷七十九

欽定四庫全書

集部

宋元詩會卷八十一

詳校官中書_臣陸湘

主事銜_臣徐以坤覆勘

總校官知縣_臣繆琪

校對官中書_臣田尹衡

謄錄監生_臣金拱閻

欽定四庫全書

宋元詩會卷八十

兵部主事陳焯編

隄都拉

下

華清曲題楊妃病齒

沈香亭北春晝長
海棠睡起扶殘妝
清歌妙舞一時靜
燕語鶯啼空斷腸
朱唇半啟榴房破
脂清紅注珍珠顆
一點春酸入瓠犀
雪色鮫綃濕香唾
九華帳裏熏蘭烟

玉肱曲枕珊瑚偏玉釵半脫翠蛾斂龍髯天子空垂涎
妾身雖侍君王側別有閒情向誰說斷腸塞上錦裯兒
萬恨千愁言不得成都遙進新荔枝金盤紫露甘如飴
紅塵一騎不成笑病中風味心自知君不聞華清宮一
齒作楚藏禍癰又不聞馬嵬坡一身濺血未足多漁陽
一日鼙鼓動始覺開元天下痛雲臺不見漢功臣三十
六牙何足用

楊花曲

燕京女兒十六七
顏如花紅眼如漆
蘭香滿路馬如飛
窄袖籠鞭嬌欲滴
春風淡蕩搖春心
銀箏銀燭高堂深
繡裳不暖錦鴛夢
紫烟紅霧天沈沈
芳年誰惜去如水
春困著人倦梳洗
夜來小雨濕天街
滿院楊花飛不起

芙蓉曲兼善狀元索賦

秋江渺渺芙蓉香
秋江女兒將斷腸
絳袍春淺護雲暖
翠袖日暮迎風涼
鯨魚風起江波白
霜落洞庭飛木葉
蕩舟何處採蓮人
愛惜芙蓉悴顏色

如夢曲哀燕將軍

芙蓉花為誰好洞房昨夜將軍老將軍老去空鐵衣漆
燈照室人不歸

宮錦袍毳帳高將軍夜酌涼蒲萄蒲萄力重醉不醒美
人猶在珊瑚枕

海子頭誰家樓繡簾半捲風悠悠行人謂是將軍府將
軍不來罷歌舞

平村曲春水綠將軍獵回曾此宿將軍一去成荒丘依

舊平村春水流

皓齒歌細腰舞綠窻朱戶將軍府將軍老去無少年為
野草兮為荒田

如花人櫻桃唇傍人近前丞相嗔繁華日日笙歌動世
事悠悠總如夢

鞦韆謠

寒梅零落春雪灑蒲娘腰瘦無一把淡黃楊柳未成陰
何人已繫青驄馬畫樓深處迎春歸鞦韆影裏紅杏肥

濛濛花氣濕人面東風吹冷輕羅衣衣上粉珠流不歇
暗解翠裙花下摺殷勤莫遣燕子知會向人間報風月

過嘉興

三山雲海幾千里十幅蒲帆挂秋水吳中過客莫思家
江南畫船如屋裏蘆芽短短穿碧沙船頭鯉魚吹浪花
吳姬蕩槳入城去細雨小寒生綠紗我歌水調無人續
江上月涼吹紫竹春風一曲鷓鴣詞花落鶯啼滿城綠

江南樂

江南樂春水虹橋滿城郭出門不用金馬絡門前花船
如畫閣綠紗窻虛鎖春霧隔窻蛾眉秋水活翡翠冠高
羅袖濶楚舞吳歌勸郎酌紫竹瑤絲相間作船頭柳花
如雪落船尾彩旗風綽綽秉燭夜遊隨意足人生無如
江南樂

江南怨

江南怨生男遠遊生女賤十三畫得蛾眉成十五新妝
識郎面識郎一面思猶淺千金買官遊不轉郎家水田

跨州縣大船小船過淮甸買官未得不肯歸不惜韶華
去如箭楊花簾幕飛乳燕疎雨梧桐閉深院人生無如
江南怨

過居庸關

至順癸酉歲

居庸關山蒼蒼關南暑多關北涼天門曉開虎豹卧石
鼓晝擊雲雷張關門鑄鐵半空倚古來幾度壯士死草
根白骨棄不收冷雨陰風泣山鬼道傍老翁八十餘短
衣白髮扶犁鋤路人立馬問前事猶能歷歷言丘墟夜

來鋤豆得戈鐵雨蝕風吹失顏色鐵腥惟帶土花青猶
是將軍戰時血前年人復鐵作門貔貅萬竈如雲屯生
存有功挂玉印死者誰復招孤魂居庸關何崢嶸上天
胡不呼六丁驅之海外休甲兵男耕女織天下平千古
萬古無戰爭

七夕後一夜樂陵臺上懷李御史公藝

涼風吹動梧桐葉瀉下泠泠露華白樂陵臺上悄無人
獨倚梧桐看秋月月高當午桐影直不覺衣沾露華濕

此時却憶金陵人酒醒江樓聽吹笛

偕卞敬之遊吳山駝峯紫陽洞

天風吹我登駝峯大山小山石玲瓏赤霞日射紫瑪瑙
白露夜滴青芙蓉飄飄雲氣穿石室石上涼風吹細竹
挂冠何日賦歸來掃石篝燈洞中宿

題壽監司所藏美人織錦圖

卷中織錦秦川女大姬啞啞弄機杼小姬織倦何所思
簾幕無人燕雙語成都花發江水春門前馬嘶車轢轢

髻雲兩耳看欲墮蛾眉八字畫不伸行人一去無消息
冰蠶吐絲成五色柔腸九曲細如絲萬縷春愁政如織
綺窗睡起聞早鶯西樓月落金盆傾暖霞拂地海棠曉
香雪潑戶梨花晴日長春院機聲動梭影穿花飛小鳳
水心驚起鴛鴦棲花底不成蝴蝶夢纖纖玉指柔且和
香鉤小襪裁春羅滿懷心事付流水蕩目雲錦迴青波

梅仙山行

赤星落地漢祚微端門日日腥風吹咸陽秋色壓宮樹

金人夜泣銅駝悲先生袖疏探虎窟漢鼎猶堪支一足
九重烟霧似海深門外何人知慟哭賊莽白日升高臺
玉璽墮地聲如雷周公揖讓孺子戲絳袍將軍何日來
塵飛滄海風擲瓦白鶴身輕快如馬一聲鐵笛度閩關
山月溪風共瀟灑龍爭虎鬪耳不聞長嘯袖拂松枝雲
夜鐺白石煮秋雨玉佩赤錦飄霞裙先生一去幾千載
尚有當年遺跡在題詩絕壁寄先生頓使林巒顏色改
藥爐寂寞秋草深丹井水落莓苔侵至今火灰化為土

猶有丹光穿樹林

過淮河

淮水清河水黃出門偶爾同異鄉排空捲雲若飛電隨風逐浪庸何傷東流入海殊不惡萬里同行有清濁

西樓別寄閩憲諸公

八月八日溪上別溪上彩旗紅獵獵離情已逐渡江雲
邊草連天翦秋色玉驄金虎諸大夫欲別不別留斯須
沙明淺渚白鳥下酒盡落日青山孤丈夫有淚不須灑

去客挂帆君上馬悠悠回首各東西惟見西溪捕魚者
閩關一片月太行一片雲雁書遠寄隔山嶽雲飛月明
多憶君

送友人之金陵

陳郎買舟上金陵寒江水落風浪小飛帆遠挂蔣山青
空城畫角秦淮曉白門酒美東冶亭吳姬喚客客不行
樓中子弟盡年少玉奴行酒吹鸞笙陳郎不聽黃金縷
朝走東吳暮走楚半生落魄一故袍感慨長歌弔千古

六朝遺跡生暮烟故家荒塚迷花鈿鳳凰臺上醉李白
何人知子囊無錢

為九江方七高賦

匡廬山中有佳士讀書結屋青雲松碧窻夜影紫翠動
落日照見香爐峯窺燈夜壁山鬼過采蘭東徑仙人逢
危簷墮雪聽風竹古寺隔嶺聞烟鐘每思幽絕動歸興
歲晚落葉迷行踪扁舟何日過湖口分我半壁青芙蓉
中秋月夜泛舟於金陵石頭城

秦淮流水西復東倒涵天影磨青銅飛廉掃空出海月
明珠飛入琉璃宮著我扁舟二三友江上雪槎泛斗斗
笑語人間兩岸燈進君江上一尊酒醉來起舞聽浩歌
宛如玉樹春風和世間樂事古來少天下明月今夕多
六代江山自瀟灑潮落潮生石城下人生得意當夜遊
此月此水年年秋

雨傘

開如輪合如束剪紙調膏護秋竹日中荷葉影亭亭雨

裏芭蕉聲簌簌晴天却陰雨却晴二天之說誠分明但
操大柄常在手覆盡東西南北行

春別

花氣壓簾愁不掃細雨粼粼長芳草玉釵燕尾剪春寒
坐惜流年鏡中老東風吹柳人不知春嬌滿眼顰雙眉
吳松錦字夢中得曉來月落聞烏啼南園日暖蝴蝶醉
香霧熏人海棠睡朱門小立蹴金蓮落紅起作離人淚
春遊太真觀

東風惱人如著酒曉鶯啼斷門前柳青山忽然契我懷
飛上玄都拾星斗綠雲弄雨小立久幾片落花春在手
遼東白鶴胡不歸松下丹鉛老霜白

過桐廬

桐廬山水天下清洪濤拍岸山圍城桐君已乘丹鳳去
世間草木誰知情落日搖紅魚尾赤江上潮回沙嘴立
三三兩兩野人家半住漁村半樵牧盡拋章甫求仙靈
松間黃鶴喚不應阻風三日看山色平生慣識枯枝藤

碧桃海上開多少幾度春風長瑤草白雲滿地不歸來
石爛松枯天地老

送石民瞻吳江訪友

老友吳江去吳江水尚高一樽散鱸膾四月過櫻桃
鑠綠玉杖風流白紵袍西窗故人夜應是動揮毫

和學士伯生虞先生寄韻

白鬢眉山老玉堂清晝聞聲名滿天下翰墨落人間才
俊賈太傳行高元魯山獨憐江海客樽酒夜闌珊

投宿龍潭道林寺

倦遊借禪榻客意稍從容
落日江船鼓孤燈野寺鐘
竹雞啼雨過山白帶雲春
半夜波濤作長潭起卧龍

送景南上人歸江西

登高傷遠別鴻雁幾行飛
萬木江頭落一僧船上歸
故山秋嶂遠殘日晚鐘微
亦有同袍者多應候竹扉

偕趙逢吉避暑石頭城日暮余歸逢吉留宿山中

却寄

竹下一僧坐城頭獨客還星河到平地風露滿空山犬
吠松林外燈明石壁間故人借禪榻心共白雲間

夜宿昇龍觀

舊日宸遊地朱欄護輦紋龍飛九天雨鶴夢一龕雲神
火丹爐見仙音客枕聞殷勤謝道士深夜禮茅君

秋日雨中登石城訪長老珪白巖不遇

石頭城畔去紅葉雨紛紛半日不見路四山都是雲魚
龍隨水上鐘磬隔江聞遙憶南莊叟天寒補衲裙

苦雨水溢呈憲司諸公

病客如僧懶多寒擁毳裘三山一夜雨四月滿城秋海
瘴連雲起江湖入市流釣竿如在手便可上漁舟

送李恕可隨王宗師入京

借得茅山鶴乘風飛上天江聲近九里客路已三千禁
闕紅雲上家鄉碧海邊待聞金馬詔復見玉堂仙

送莫秀才歸番陽

番陽秋水落白下買船還遠夢驚新雁歸帆識舊灣打

碑過薦福携酒看芝山却憶曾遊處清溪萬柳間

寄石民瞻

京口石彭澤詩懷似鶴形蒼天容老健白髮照江清夜
鼎薰雞舌秋袍織鳳翎醉扶綠玉杖應望石頭城

題紫薇觀馮道士房

卜築長江上回峯晚更奇山村猿索飯竹屋鶴聽碁雲
護燒丹竈泉香洗藥池道人足高興不許俗人知

次崔鎮壁間韻

木落歲時晏黃雲欲雪天買魚河下客立馬渡頭船野
迥風欺帽天寒袖裏鞭夜眠三鼓後曉發五更前

寄王御史

御史傳天語飛霜到海垠浙江潮似雪閩海臘如春孤
客見明月亂山愁遠人何時動歸興家有白頭親

送管元帥南征

楚帆風一葉此去幾時還日暮漢江碧雨晴湘竹斑邊
聲連草木野色動荆蠻決策平徭後歸心北固山

鍾山遇風雨

城市多驄馬清遊有幾人
山靈飛白雨朝士說紅塵
雲起鐘樓暝桃開野寺春
上人歸太晚誰主復誰賓

龍潭送侍中田美中攜酒十里作

公子青驄馬追隨十里遙
風頭雲葉凍酒面雪花消
惜別頻回首無因見舞腰
君歸金帳暖何限可憐宵

送宣古木

鐵面小將軍旌旗照海門
兵機出孫武膽氣走桓溫
社

稷劍三尺乾坤酒一樽
茫茫雲漢內此意與誰論

山中懷友

自是麒麟種卑栖又幾年
故廬南雪下短褐北風前
歲暮山林瘦天高雨露偏
惟應丈夫志未受人憐

送唐卿御史

去去紅塵外秋光滿華嵩
故鄉歸衣錦行路避乘驄
未覺長安遠真成冀北空
燕山一枝桂回首正西風

宿大橫驛

燈火明沙渡牛羊過水西村春千澗落野店四山齊桂
樹偏宜月人家盡向溪秋蟾莫相惱惟聽度關雞

遊梅仙山和唐人韻

二首

城郭千峰合仙凡一水分顛崖縣鳥道亂石聚羊羣苔
井分丹水茶爐煮白雲肩輿萬松嶺有客訪梅君
絕頂尋仙跡寒泉照病容栖鸞多種竹愛鶴莫移松丹
藥人來乞山榎手自春秋深霜葉滿麋鹿日相逢

次王御史

江城連日雪騎馬欲何之老樹昏鴉集寒塘落雁遲松
窻燈下酒竹屋夜深棋寄語王公子幽棲或可期

塵鏡

古鏡色如墨千年獨此留玉臺蟲網暗珠匣土花浮莫
笑塵埃滿曾令鬼魅愁蟠龍今已化雲雨夢悠悠

廢繫

不解照珠翠早同文字盟何年中路棄無復向人明宿
雨高齋夢秋吟廢館情相看幾今夕及此慨平生

斷碑

零落秋風卧何年破廟碑圖經愁莫載耆舊說頻移野
燒龜文失荒臺鳥跡疑遙知千載後拂拭轉堪悲

卧鐘

龍虞久摧折深埋奈爾何耕民誰睥睨野衲自摩挲雅
奏多年歇銘文幾字訛斜陽荆棘裏長伴舊銅駝

道中謾興

雲氣千峰暝溪流水拍橋竹溪泥滑滑榕樹雨瀟瀟曲

棧鈎崖角垂虹挂嶺腰山家酒初熟或許借椰飄

京口夜坐

鐵甕城頭刻漏逢涼霜如雪撲簾飛雁聲墮地夢迴枕
月色滿城人搗衣塞北將軍猶索戰江南遊子苦思歸
呼鷹腰箭從圍獵苜蓿秋深馬正肥

登金山雄跨亭

朱欄六曲倚高秋元氣茫茫日夜浮客去客來天地老
潮生潮落古今愁疎鐘水國前朝寺落日海門何處舟

更擬黃昏盡餘興却從燈火望揚州

寄天竺長老訴笑隱召住大龍翔集慶寺

東南隱者人不識一日才名動九重
地濕厭看天竺雨月明來聽景陽鐘
衲衣香暖留春麝石鉢雲寒卧夜龍
何日相從陪杖履秋風江上採芙蓉

高郵城樓曉望

城上高樓城下湖城頭畫角曉鳴鳴
望中燈火明還滅天際星河澹欲無
隔水人家種楊柳帶霜鳬雁起菰蒲

短衣匹馬非吾事擬向烟波覓釣徒

和中丞伯庸馬先生贈別

江南驛使路遙遙
遠赴龍門看海潮
桂殿且留修月斧
銀河未許渡星軺
隔花立馬聽更漏
帶月鳴珂趁早朝
祇恐淮南春色動
萬竿烟雨綠相招

寄京口鶴林寺長老即休

白頭不出城南寺
枯坐蒲團笑客忙
過暑葛衣從破碎
逢秋竹院愈荒涼
空山雲濕龍歸鉢
古屋松低鶴到牀

遙憶題詩舊遊處夜深東壁月蒼蒼

次學士盧疎齋題贈句容唐別駕

疎齋落落謫仙才句曲名山數往來
晚讀茶經醫酒病春從隣舍覓花栽
昔年奏對含雞舌今日登臨獨鳳臺
賴有間居唐別駕相尋猿鶴莫驚猜

三衢守馬昂夫索題爛柯山石橋

洞口龍眠紫氣多登臨聊和采芝歌
爛柯仙子何年去鞭石神人此地過
烏鵲橫橋秋有影銀河垂地夜無波

遙知題柱凌雲客天近應聞織女梭

宿茅山崇禧觀南塢樓

天際三峯橫紫烟山前山後盡芝田樓臺未疑無路
雞犬雲中半是仙白石經年皆化玉青松鎮日祇聞泉
曲林三館幽棲地一夜鐘樓聽雨眠

登鎮陽龍興寺閣觀銅鑄梵容

眼中樓觀見應稀鐵鳳棲簷勢欲飛天半寶花飄閣道
月中桂子落僧衣高擎玉露仙人掌上碍銀河織女機

金趙堂堂遺物在山川良是昔人非

送僉事王君實之淮東

使君臘月揚州去東閣梅開雪壓枝淮上有官皆避馬
竹西無處不題詩春風楊柳平山路夜月瓊花后土祠
從此公餘多勝覽好傳佳句遠人知

元統乙亥初春除閩憲知事謝叅政許可用惠茶
春到人間纔十日東風先過玉川家紫薇書寄斜封印
黃閣香分上賜茶秋露有聲浮薤葉夜窻無夢到梅花

清風兩腋歸何處直上三山看海霞

阻風崔鎮有感

逆風吹河河倒行阻風時節近清明南人北人俱上塚
桃花杏花開滿城雖云年少慣作客但覺此日難為情
河魚村酒亦足醉賴有同船好弟兄

贈吳山紫陽庵女道士

武林吳山紫陽庵澗民有丁姓者棄俗為全真一日
忽召其妻入山書詩四句云懶散六十三妙用無人

識順逆兩俱忘虛空鎮常寂坐抱一膝而逝俗謂之
騎鶴化其妻束髮簪冠為女道士奉其夫蛻二十年
不下山幾於得道神仙渺茫姑不暇論其婦一節乃
可尚也婦年七十王其姓諱守素亦淞人云登覽之
餘因為賦詩

不見遼東丁令威舊遊城郭昔人非鏡中春去青鸞老
華表山空白鶴歸石竹淚乾斑雨在玉簫聲斷綵雲飛
洞門花落無人迹獨坐蒼苔補道衣

過鷺湖寺

十里蒼松對寺門，四圍翠滴露紛紛。
湖心水滿通銀漢，山頂鷺飛化白雲。
玉井芙蓉天畔出，劒池雪浪月中聞。
石牀茶竈如招隱，還許閒人一半分。

臺山懷古

粵王故國四圍山，雲氣猶屯虎豹關。
銅獸暗隨秋露泣，海鴉多背夕陽還。
一時人物風塵外，千古英雄草莽間。
日暮鷓鴣啼更急，荒苔野竹雨斑斑。

層樓

廣寒世界夜迢迢
醉拍闌干酒易消
河漢入樓天不雨
江風吹月海初潮
影搖翠幙金蓮炬
夢斷涼雲碧玉簫
休唱後庭舊時曲
六朝宮殿草蕭蕭

題揚州驛

銀燭高烧照不眠
呼兒飲馬汲清泉
寒砧萬戶月如水
塞雁一聲霜滿天
金縷款歌來枕上
銀瓶索酒到亭前
明朝走向燕山道
贏得紅樓說少年

次張舉韻題皖山金氏繡野亭

南冠猶有舊風流說著舒州處處幽
最喜園林動花竹不妨城郭帶林丘
一樽濁酒青山暮三徑晚香黃菊秋
未識孤高金處士杖藜應許約同遊

贈學古澹上人

瘦影相隨九節筇同袍無處覓行蹤
遠看天目山中寺來聽石頭城裏鐘
洗鉢泉通陳井水開窻雲度蔣陵松
忽聞一夜猿啼月却憶飛來最上峰

再遊崇禧寺

野人再到城南寺
臨水芙蓉次第開
新酒瓦盆青映竹
舊題石壁綠封苔
夕陽半嶺牛羊下
秋色滿天鴻雁來
獨上新亭天地濶
不須揮淚灑蓬萊

題李遵道畫竹水圖

風流未識生前面
翰墨空遺死後名
鳳尾拂雲秋有影
龍頭出水夜無聲
半生清節江南夢
萬里靈槎海上行
應逐錦袍弄明月
倒騎赤鯉對吹笙

次韻登凌歊臺

山勢如龍去復迴，雲野望護崇臺。
離宮夜有月高下，輦路日無人往來。
春色不隨亡國盡，野花只作舊時開。
斷碑衰草荒烟裏，風雨年年上綠苔。

訪揭曼碩祕書

城中車馬多如雲，載酒問字無一人。
碧桃花開光艷艷，硯池水暖波粼粼。
先生楷書白晝靜，家童畫紙烏絲勻。
落紅滿地送客去，十年不見江南春。

采石懷李白

夢斷金雞萬里天
醉揮秃筆掃蠻箋
錦袍日進酒一斗
采石江空月滿船
金馬重門天似海
青山荒塚夜如年
抵應風骨蛾眉妬
不作天仙作水仙

登石城

登臨未惜馬蹄遙
古木秋高萬葉凋
廢館徒傳陳後主
新碑猶載晉南朝
年深堦路埋花徑
雨壞山牆出翠翹
六代興亡在何處
石頭依舊打寒潮

懷句曲外史

霞佩翩翩出洞天當時彷彿見臞仙幾年海上張公子
今日山中葛稚川滄海塵飛丹已熟玉堂人去榻空縣
林間載酒來相覓乞寫丹經與世傳

次韻寄張伯雨茅山

句曲道人門不出幾時茫樓接殷懃春晴洗藥分泉去
午睡烹茶隔竹聞山脚客行驚犬吠樹皮苔老結龍紋
三層臺上月如水半夜吹簫入紫雲

病中夜坐

江樹花開午夜春，綠香吹散隔簾雲。
吟詩思苦家人怪，搥藥聲高隣舍聞。
惟有工程餐白朮，亦無心事對紅裙。
消愁且喜樓西畔，明月一池蛙亂喧。

招隱首山分韻得生字

龍飛鳳隱知何處，今日空餘黃鵠名。
千古江山圍故國，五更風雨入空城。
猿啼洞府暮雲合，花落祠堂春草生。
何日結茅向青壁，抱琴坐石聽泉聲。

酌桂芳庭

桂枝秋露洗銀瓶
醉裏題詩記答曾
接竹池通丹井水
隔松人誦藥珠經
茶香石鼎燒紅葉
酒渴冰盤破紫菱
一帶鍾山青未了
碧窻雲氣護龍亭

次韻叅政繼學王先生自海南還桂林

空山幽響落林柯
蠻犬呶呶吠碧蘿
大庾嶺頭三月盡
鬱孤臺下幾人過
檳榔雨過鳩鳴急
薜荔雲深猿嘯多
幾度栽詩寄相憶
江南如此奈愁何

九華山題石潭驛

馬上行人看九華
飄飄高旆倚天涯
排空峭石生玄筍
落日奇峯挂赤霞
仙掌三秋擎露屑
天河半夜礙星槎
雲中五老應招手
喚客來遊太乙家

夢登齊山得詩二首

登高遠望四山齊
何處風流杜牧之
白苧曾聽松下唱
紫簫還向月中吹
野雲雨後無行跡
芳草春深有斷碑
夢裏勝遊閒記得
翠微亭上寫烏絲

杖藜踏破碧萋萋夢裏清遊樂未回萬壑泉聲松下去
數行秋色雁邊來文章小杜人何在風雨重陽菊自開
山路雲深行客倦竹雞飛上獨春臺

答茅山道士見寄

道人自有愛山癖蠟屐平生幾兩穿七竅冷雲秋噴竹
一琴明月夜調絃山中紫府茅君宅肘後丹方許史傳
短褐擬尋黃獨出長鑱斲雪早春前

平望驛

左帶吳松右太湖人家笑語隔菰蒲風濤不動魚龍國
烟雨翻成水墨圖越客卧吹船上笛吳姬多倚水邊壚
鑑湖道士如招隱一曲他年得賜無

過紫薇庵訪馮道士

道士愛幽居年來一事無盆池新過雨石上種菖蒲
山中華蓋洞石氣冷蕭蕭不見眠雲客惟逢避雨樵
過高郵射陽湖雜詠

飄蕭樹梢風淅瀝湖上雨不見打魚人菰蒲雁相語

秋風吹白波秋雨鳴敗荷平湖三十里過客感秋多

憩奉真道院

落花風颺步虛聲翠草玄芝爛熳生過客不知春早晚
午窻晴日睡聞鶯

過揚州

買舟南浦秋聞雁呼酒西窻夜剪燈何處玉簫天似水
瓊花一夜白如冰

上京即事

七首

一派簫韶起半空水晶行殿玉屏風諸王舞蹈千官賀
齊捧蒲萄壽兩宮

上苑棕毛百尺樓天風搖曳錦絨鈎內家宴罷無人到
面面珠簾夜不收

行殿參差翡翠光朱衣花帽宴親王繡簾齊卷熏風起
十六天魔舞袖長

中官作隊導宮車小樣紅靴踏軟沙昨夜內家清暑宴
御羅涼帽插珠花

大野連山沙作堆
白沙平處見樓臺
行人禁地避芳草
盡向曲闌斜路來

院院翻經有呪僧
垂簾白晝點酥燈
上京六月涼如水
酒渴天厨更賜冰

牛羊散漫落日下
野草生香乳酪酣
卷地朔風沙似雪
家家行帳下氍毹

過贊善庵

夕陽欲下行人少
落葉蕭蕭路不分
脩竹萬竿秋影亂

山風吹作滿窻雲

將遊茅山先寄張伯雨

借騎白鶴訪茅君
琪樹秋聲隔夜聞
料得山中張外史
開門先掃鶴巢雲

春日鎮陽柳溪道院

城外青溪出洞門
道人歸去日長曛
柳花滿地無人掃
隔水遙看是白雲

寄奎章學士濟南李溉之

山東李白似劉伶投老歸來酒未醒天下三分秋月色
二分多在水心亭

黃河舟中月夜

十丈雲帆拂斗杓星槎風急浪花飄夜深露冷銀河近
卧聽天孫織絳綃

釣臺夜興

仙茶旋煮桐江水坐客遙分石壁燈風露滿船山月上
夜深獨對釣臺僧

早發

山頭鐘響不聞鷄重露翻鴉滿樹啼艇子釣臺東畔發
月輪却在釣臺西

泊江家步無月同孟志學小酌

蘭溪春水似蒲萄越女如花壓小槽今夜共君溪上醉
直須溪月照宮袍

黃亭驛晚起

積雨莓苔上壁青曉寒山館夢初醒鷓鴣聲裏流年度

自是行人不願聽

閩城歲暮

嶺南春早不見雪臘月街頭聽買花
海國人家除夕近
滿城微雨濕山茶

彭城雜詠

三首

亞父塚前春草齊
楚王城上夕陽低
黃鶯不解興亡事
飛過海棠枝上啼

城下黃河去不回
四山依舊畫屏開
無人念得登臨意

獨上將軍戲馬臺

何處春風燕子樓
斷碑落日古城頭
畫眉人遠繁華歇
無數遠山生暮愁

奎章閣感興

二首

奎章三月文書靜
花落春深鎖閣門
玉座不移天步遠
石碑空有御書存

花落春深似去年
無人再到閣門前
當時濟濟誇多士
爭進文章乞賜錢

京城立春

燕姬白馬青絲纒短衣窄袖銀鞵光御溝飲馬不回首
貪看柳花飛過牆

雪中妃子

梁王宴罷下瑤臺窄窄紅靴步雪來疑是陽和三月暮
楊花飛處牡丹開

醉起

楊柳樓心月滿牀錦屏繡褥夜生香不知門外春多少

自起移燈照海棠

宮詞

駿馬驕嘶懶著鞭
晚涼騎過御樓前
宮娥不識中書令
借問誰家美少年

黃河

斗杓照水半垂天
水氣漲天如白烟
南北櫓聲爭上下
月中聞鼓避官船

宋元詩會卷八十

欽定四庫全書

宋元詩會卷八十一

兵部主事陳焯撰

黃潛

字晉卿婺州義烏人母童氏夢大星墜懷而生潛
潛成童能記經書迨長以文名四方中延祐二年
進士授台州寧海丞遷兩浙都轉運鹽使改諸暨
州判官入為應奉翰林文字同知制誥兼翰林國
史院編修官轉國子博士出為江浙儒學提舉年
六十七不俟引年納祿徑歸未幾詔起為翰林直
學士知制誥同修國史兼經筵官陞侍講學士兼
官如故自將仕郎七轉至中奉大夫謝政南還優

游田里凡七年卒于繡湖之私第年八十一追封
江夏郡公謚文獻潛學問淹博約之于至精剖析
經史疑難及古今制度名物多先儒所未發者文
詞布置謹嚴援据確切及門受業者後多爲名儒
所著日損齋
藁三十餘卷

雜詩

三首

晨起步南園旭日朗以清葵花衆草中粲粲數丹榮流
光非汝私獨爾心自傾覽物有深懷佇立方含情
璞玉與寶劍淪落初未偶君看被煎被各在千年後將
身比金石誰當獨長久悠悠百代下相知復何有